

Saša Magazinović

Inicijativa upućena Vijeću ministara BiH: „Google mape - trenutno najviše korišteni servis za pretraživanje mapa u svijetu, preko veb-stranice Google mapa moguće je satelitski ili kartografski gledati gotovo sve države svijeta do te mjere detaljno da i u malim mjestima možete vidjeti plan ulica, značajnije objekte itd. Također većina navigacijskih sistema se upravo nastavlja na Google mape kao svoju osnovnu platformu, a ono što je jednako važno je činjenica da turisti umnogome koriste ovaj servis pri planiranju putovanja ili u toku samog boravka u mjestima koja posjećuju.

Upravo iz svih ovih razloga zabrinjavajuća je činjenica da je, prema informacijama koje se mogu naći na internetu a koje možete i sami provjeriti, Bosna i Hercegovina jedina zemlja u Evropi koja nema ucrtane i, kako informatičari kažu, otključane mape gradova u Bosni i Hercegovini, dok, ako gledamo u svjetskim razmjerama uz Bosnu i Hercegovinu samo još Sjeverna Koreja nije prisutna na ovom velikom svjetskom atlasu. Za Sjevernu Koreju možemo pretpostaviti zašto nije tu prisutna, ali objašnjenje za Bosnu i Hercegovinu tražim u okviru ovog poslaničkog pitanja, odnosno inicijative. Mislim da nema potrebe dalje objašnjavati šta to znači za imidž Bosne i Hercegovine ili kakve su reakcije potencijalnih turista koji planiraju put u Bosnu i Hercegovinu, pa to pokušaju ostvariti na uobičajen način kako to čine.

Neformalne grupe mladih ljudi iz Banje Luke i Sarajeva pokušale su inicirati prema kompaniji Google rješavanje ovog pitanja, postoje neka obećanja, ali ja iniciram da se u čitavu tu priču uključi nadležno ministarstvo kontaktirajući kompaniju Google ili na drugi način koji smatraju korisnim kako bi se na svjetski poznatom servisu pojavila i mapa odnosno mape unutar Bosne i Hercegovine. I pored toga tražim informaciju o postupanju Ministarstva po ovoj inicijativi.“